

laburrean

■ Jose Luis Garaioa misiolaria EEBBetara joan da, mexikar etorkinei laguntzera

SIERRA LEONAN 15 egunetan bahituta egon zen misiolaria, Jose Luis Garaioa, Estatu Batuetara joan da etorkin mexikarrei laguntza eskaintzera. Mexikotik Estatu Batuetara muga zeharkatzen duten mexikarrei laguntza eskaintzeko hiru hilabete egingo ditu han misiolari nafarrak. Laguntzeaz gain, ingelesa ikasteko asmoa du Garaioak. Estatu Batuetan egongo den tarte horretan Sierra Leonan egoera baretzea espero du, lehenbailehen berriz ere hara joateko. Estatu Batuetako bidaian bi egun New Yorken egingo ditu, eta ondoren Kaliforniara joango da, estatu hartako Las Cruces herrira hain zuzen ere. X

■ Sei pertsona zauritu ziren Gipuzkoan eta bat Bizkaian atzo izandako auto istripuetan

SEI LAGUN zauritu ziren atzo Gipuzkoan izandako bost auto istripuetan, baina guztiek zauri arinak dituzte soilik. Atzo izandako lehenengo istripua Legorretan izan zen, goizaldeko 05:20an. Ezbehar horren ondorioz, 60 urteko J.B.B. gizonezkoa Tolosako ospitalera eraman zuten. Goizeko 08:00etan, berriz, Idiazabalen kamioi bat irauli egin zen, eta, ondorioz, 47 urteko I.M.R. Zumarragako ospitalera eraman zuten zauri arinak sendatzeko. Berasategin, aldiz, bi autok elkar jota, M.R.G. eta C.J.V.S. izenekoak arin zauritu ziren. Arrasaten, berriz, 30 urteko I.U.A. zauritu zen, kamioi baten kontra izandako istripuan. Gipuzkoako azken istripua Zizurkilen izan zen: bi autok elkar jo eta 30 urteko A.I.R. zauritu zen. Bestalde, Bizkaian izandako istripuan, pertsona bat zauritu zen Galdakaon. 56 urteko A.E.G. motor gidariak kontrola galdu zuen, eta lurrera erori zen. X

■ Air Nostrum konpainiak ez du dirulaguntzarik jasoko zerbitzuaren hainbat hutsune bete arte

NAFARROAKO GOBERNUKO Herrilan departamentuak ez dio dirulaguntzarik emango Air Nostrum konpainiari, zerbitzuan dituen hainbat hutsune betetzen dituen arte. Hegazkin konpainia horrek Madrilera eta Bartzelonara egiten ditu hegaldiak Noingo aireportutik, eta joan den martxoan hainbat hutsune topatu zituzten zerbitzuan. Herrilan sailak agindua zion aire konpainiari hiru hilabetea ordainduko ziren 50 milioiko dirulaguntza urtean, baina urteko lehen hiru hilabeteak igarotzean, hitz emanda zituen hainbat zerbitzu ez direla bete ikusi eta horiek bete arte ez dio dirulaguntzarik emango aire konpainia horri. Aurkitu dituzten arazoaren artean, besteak beste honako hauek azpimarratu dituzte: zaharregiak diren hegazkinen hegaldietan atzerapenak, hegaldiak bertan behera uztea, hegazkinen motor arazoak, eta zerbitzu horien erabiltzaileek egin dituzten kexuak, konpainia horrek eskaintzen duen zerbitzu eskasa dela eta. X

Kolonbiari buruzko hitzaldi sorta hasiko da gaur Iruñean

IPESek eta GKEek antolatuta, aditu kolonbiarrak izango dira

Kolonbiari buruz Iruñean egin asmo ziren nazioarteko topaketak bertan behera gelditu baziren ere, herrialde hari buruzko zenbait hitzaldi izango dira Iruñean, Bizitzaren aldeko borroka lelopean. IPES, Gizarte Ikas-tetarako Talde Eragileak, Sodepaz eta Mugarik Gabe gobernu kanpoko erakundeak izan dira ekimen horren bultzatzaileak. Kolonbiatik etorritako aditu batzuk arduratuko dira hango egoera azaltzeaz. Gaur, bihar eta etzi Iruñera ez ezik Nafarroako beste herri batzuetara ere zabalduko dira hitzaldiak.

Eli Eraso / Iruñea

KOLONBIAKO gatazkaren inguruan nazioarteko topaketa bultzatzen aritu ziren elkarte eta gobernu kanpoko erakundeek ez dute bere eginahalean etsi, eta, nahiz eta Nafarroako Gobernuak topaketak bertan behera utzi, gaiari loturiko beste saio bat bultzatu dute IPES elkarteak, Sodepaz eta Mugarik Gabe elkarteek. «Kolonbiari buruz Iruñean egin asmo ziren nazioarteko topaketak bertan behera gelditu baziren ere, ez dugu etsi, eta, ahal genuen neurrian jardunaldi horiei eutsi nahian, hitzaldi sorta antolatu dugu», azaldu zuen atzo aurkezpen ekitaldian Javier Aisak, IPESeko ordezkariak.

IPESeko kidearen arabera, «gaurkotasun osoa duen gai bat da» Kolonbiari buruzkoa: «Herrialde hartan hil bukaeran presidentea hautatzeko lehen itzulua egingen da. Halaber, azkenaldian giza eskubideen alde borrokan ari direnen aurkako eraso bortitzak gertatzen ari dira, bahiketak eta hilketak etengabe, baina horrelakok isilpean gordetzen dituzte», azaldu zuen Aisak.

Kolonbiako herritarrek euren larruan indarkeriaz beteriko lau hamarkada pairatu dituztela



Javier Aisa, IPESeko kidea eta antolatzailea.

ARTXIBOKOA

ekarri zuten gogora antolatzaileek, eta horretaz guztiaz gogoeta egin nahi dutela.

Jakinarazi zuten, Kolonbia «lehengaitan aberatsa den lurralde zabal bat da, baina irtenbiderik agerian ez duen espiral batean sartuta dago». «Hori dela eta, gizarte zuzengabekeria, hilketak eta indarkeria dira nagusi Kolonbian», gaineratu zuten.

Hala eta guztiz ere, «han borrokatzen» jarraitzen dela azpimarratu nahi izan zuten jardunaldion antolatzaileek. Hain zuzen ere, jardunaldiok «borroka horren zatitxo bat» izatea nahi dutela adierazi zuten GKEetako kideek.

Eztabaida-hitzaldiak Iruñean eta Iruñetik kanpo. Bizitzaren aldeko borroka jardunaldien barruan, gaur egingen da lehen hitzaldia

Iruñean. Luis Alberto Mata, Caucaen Haraneko Bakerako aholkulari ohia eta giza eskubideen aldeko aktibista mintzatuko da, *Giza eskubideak eta biziaren aldeko borroka* goiburua duen hitzaldian.

Bihar, asteazkena, Antonio Suarez Kolonbiako Epaileen Elkarte Nazionalako lehendakariordeak hartuko du lekukoa, eta Kolonbiako sistema judiziala aztertuko du.

Etzi, azkenik, Luis Fernando Moncada soziologoak Kolonbiako indarkeria politikoaren gaia jorratuko du.

Saio hauek guztiak Iruñeko Hizkuntza Eskolako aretoan egingo dira; hitzordua arratsaleko 20:00etan izango da, egunero. Iruñeko hitzaldi hauetaz gain, beste eztabaida-hitzaldi batzuk ere egingen dira Nafarroako beste zenbait herritan. X

ESKELAK



**Iñaki
Goikouria
Orbe**

**Xabier
Goikouria
Larrabeiti**

*Bihotzean min dut, min etsia,
negar ixila darion mina.*

**Xabier eta Iñaki
gogoan izango
zaituztegu beti**

**ALTZAGA IKASTOLA
(Leioa)**

1998ko maiatzak 26



**Iñaki
Goikouria
Orbe**

**Xabier
Goikouria
Larrabeiti**

**Gobela Ikastolak
ez zaituzte
ahaztuko**

1998ko maiatzak 26



**Kristina
Zabala
Arrue**

**(Jokin Zubeldiaren
emaztea)**

Egunkaria

1998ko maiatzak 26

ESKELAK

**Gaueko 9ak arte
hartzen dira**



(943) 300 222